



Broj/ Број : 02/2-50-1-23-28/09

Sarajevo/ Сарајево: 15.7.2009. godine

ZAPISNIK

28. sjednice Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine Bosne i Hercegovine, održane 9.7.2009. godine

Sjednicu Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH (u daljnjem tekstu: Komisija) sazvala je predsjedavajuća Komisije Alma Čolo.

Sjednici Komisije, u svojstvu članova, prisustvovali su: Alma Čolo, Dušanka Majkić, Adem Ibrahimpašić i Slobodan Šaraba, te Nenad Pandurević, sekretar, i Dobrinka Savić, stručni saradnik u Komisiji. Opravdano je odsustvovao Branko Zrno. (Rudi Vidoviću je zbog prelaska na dužnost ministra saobraćaja i komunikacija BiH pretao mandat delegata u Domu naroda PSBiH, pa time i članstvo u Komisiji, a novi član do održavanja sjednice još nije bio imenovan).

Sjednici su, u svojstvu predlagača i izvjestilaca, prisustvovali: Rudo Vidović, ministar, i Zahida Hurtić-Strika, šef Odsjeka za normativnu djelatnost u Ministarstvu komunikacija i prometa BiH, Brankica Pandurević, šef Odsjeka za vodne resurse i turizam, i Ljubiša Ćosić savjetnik ministra vanjske trgovine i ekonomskih odnosa BiH, Sead Avdić, savjetnik u Kabinetu ministra vanjskih poslova BiH, Miroljub Krunić, pomoćnik ministra finansija i trezora BiH, Milijana Lale, viši stručni saradnik u Ministarstvu civilnih poslova BiH, Stjepo Pranjić, predsjednik Konkurencijskog vijeća BiH, Emir Povlakić, rukovodilac Sektora Regulatorne agencije za komunikacije BiH, Nikola Deretić, predsjednik Upravnog odbora BHRT- a, Sead Miljković, član Upravnog odbora, i Ajla Mostarac, izvršni direktor u Vijeću stranih investitora, Ilija Filipović i Zoran Koprivica, delegati u Domu naroda, kao predlagači amandmana na Prijedlog zakona o izmjenama i dopunama Zakona o konkurenciji, Igor Petković, savjetnik zamjenice predsjedavajućeg Doma naroda Dušanke Majkić, Zoran Brkić, viši stručni saradnik u Sektoru za odnose s javnošću u PSBiH.

Sjednica Komisije počela je u 12 sati.

Prije rasprave o dnevnom redu, predsjedavajuća Alma Čolo podsjetila je da, i pored činjenice da sjednici ne prisustvuju članovi Komisije iz hrvatskog naroda, Komisija ima kovorum za rad, s obzirom da je posljednjim izmjenama Poslovnika Doma naroda predviđeno da je za donošenje odluka potrebno prisustvo najmanje većine članova Komisije. Dalje je dodala da je za konačne odluke Komisije za koje nije predviđeno izjašnjavanje Doma naroda i dalje neophodno da većina za njihovo donošenje uključuje sva tri konstitutivna naroda, ali da za današnju sjednicu nije predviđeno razmatranje takvih tačaka dnevnog reda. Izrazila je nadu da ova situacija neće dugo potrajati, tj. da će novi član Komisije umjesto Rude Vidovića biti vrlo brzo imenovan, odnosno da će Komisija biti u punom sastavu.

Nakon što je konstatirala da postoji kvorum, predsjedavajuća Komisije Alma Čolo predložila je sljedeći

DNEVNI RED

1. Usvajanje Zapisnika 27. sjednice Komisije;
2. Razmatranje Prijedloga zakona o izmjenama i dopunama Zakona o konkurenciji (druga komisijska faza), predlagač: Vijeće ministara BiH;
3. Razmatranje Prijedloga zakona o izmjenama i dopunama Zakona o osnovama sigurnosti saobraćaja na putevima u BiH (prva komisijska faza), predlagač: Zajednička komisija za ljudska prava, prava djeteta, mlade, imigracije, izbjeglice, azil i etiku Parlamentarne skupštine BiH;
4. Davanje saglasnosti za ratifikaciju Sporazuma između Vijeća ministara BiH i Vlade Države Izrael o ukidanju viza za nosioce diplomatskih i službenih pasoša;
5. Davanje saglasnosti za ratifikaciju Sporazuma između Vijeća ministara BiH i Vijeća ministara Republike Albanije o uzajamnim putovanjima državljana;
6. Davanje saglasnosti za ratifikaciju Sporazuma između Vijeća ministara BiH i Vlade Savezne Republike Njemačke o finansijskoj saradnji u 2006. godini;
7. Davanje saglasnosti za ratifikaciju Zasebnog aranžmana između Frankfurta na Majni i Bosne i Hercegovine, koju zastupa Ministarstvo finansija i trezora BiH, kao i Federacije Bosne i Hercegovine, koju zastupa Federaino ministarstvo finansija, i Republike Srpske, koju zastupa Ministarstvo finansija za zamjenu duga 2;
8. Davanje saglasnosti za ratifikaciju Konvencije o zaštiti i korištenju prekograničnog vodotoka i međunarodnih jezera, Helsinki, 17. marta 1992. godine;
9. Davanje saglasnosti za ratifikaciju Dodatka na Memorandum o razumijevanju između Vijeća ministara BiH i Vlade Kraljevine Holandije o Programu za saradnju s tržištima u nastajanju (PSOM);
10. Davanje saglasnosti za ratifikaciju Konvencije o klauzulama o radu (javni ugovori), broj: 94 iz 1949. godine, i Preporuke o klauzulama o radu (javni ugovori), broj: 84 iz 1949. godine, Međunarodne organizacije rada;
11. Davanje saglasnosti za ratifikaciju Konvencije o radu na nepuno radno vrijeme, broj: 175 iz 1994. godine, i Preporuke o radu na nepuno radno vrijeme, broj: 182 iz 1994. godine, Međunarodne organizacije rada;
12. Davanje saglasnosti za ratifikaciju Konvencije o sigurnosti i zdravlju u rudnicima, broj: 176 iz 1995. godine, i Preporuke o sigurnosti i zdravlju u rudnicima, broj: 183 iz 1995. godine, Međunarodne organizacije rada;
13. Davanje saglasnosti za ratifikaciju Konvencije o radu kod kuće, broj: 177 iz 1996. godine, i Preporuke o radu kod kuće broj: 184 iz 1996. godine, Međunarodne organizacije rada;
14. Davanje saglasnosti za ratifikaciju Konvencije o privatnim agencijama za zapošljavanje, broj: 181 iz 1997. godine, i Preporuke o privatnim agencijama za zapošljavanje, broj: 188 iz 1997. godine, Međunarodne organizacije rada;
15. Davanje saglasnosti za ratifikaciju Konvencije o zaštiti materinstva, broj: 183 iz 2000. godine, i Preporuke o zaštiti materinstva, broj: 191 iz 2000. godine, Međunarodne organizacije rada;
16. Davanje saglasnosti za ratifikaciju Konvencije o sigurnosti i zdravlju u poljoprivredi, broj: 184 iz 2001. godine, i Preporuke o sigurnosti i zdravlju u poljoprivredi, broj: 192 iz 2001. godine, Međunarodne organizacije rada;
17. Davanje saglasnosti za ratifikaciju Konvencije Međunarodne organizacije rada o identifikacionim dokumentima pomoraca (revidirana), broj: 185 iz 2003. godine.;
18. Davanje saglasnosti za ratifikaciju Konvencije o radu u ribolovu, broj: 188 iz 2007. godine, i Preporuke o radu u ribolovu broj: 199 iz 2007. godine;

19. Davanje saglasnosti za ratifikaciju Konvencije Međunarodne organizacije rada o radu na moru (MLC) iz 2006. godine;
20. Razmatranje Izvještaja o radu Upravnog odbora RTV BiH za 2007. i 2008. godinu i Izvještaja o radu RTV BiH za 2008. godinu;
21. Razmatranje Rang-liste kandidata za člana Upravnog odbora Javnog radiotelevizijskog servisa BiH iz srpskog naroda (Dopis Regulatorne agencije za komunikacije BiH, broj: 01-50-1687-1/09, od 15.6.2009.);
22. Razmatranje informacije Ministarstva vanjskih poslova BiH o stanju i razvoju DKP mreže Bosne i Hercegovine (Dopis Ministarstva vanjskih poslova broj: 10/1-1-2-05-5992-3/09, od 11.06.2009.);
23. Razmatranje izvještaja i informacija Ministarstva vanjskih poslova BiH:
 - Nacrt 15. monitoring izvještaja Vijeća Evrope;
 - Sastanak Vijeća EU za opće poslove i vanjske odnose, 18. i 19.5.2009., u Briselu;
 - Protestna nota Republike Hrvatske;
 - Parlamentarna saradnja BiH i Maroka;
 - Sastanak Vijeća EU, 15. juni 2009., Brisel;
 - Preliminarna analiza izbora za Evropski parlament;
 - Informacija Misije BiH pri EU u Briselu o odnosima između BiH i EU;
24. Razmatranje izvještaja o međunarodnim aktivnostima komisija i parlamentarnih delegacija PSBiH:
 - Izvještaj s godišnje ekonomske konferencije Parlamentarne skupštine OSCE-a „Svjetska finansijska kriza“, Dublin, 27. i 28. maj 2009.;
 - Izvještaj o posjeti Komisije za vanjske poslove Predstavničkog doma Parlamentarne skupštine BiH Republici Estoniji, 18. i 19. maj 2009.;
 - Izvještaj o posjeti Odbora za izbor, imenovanja i upravne poslove Hrvatskog sabora, obavljenoj 16.3.2009.
25. Tekuća pitanja:
 - Upoznavanje sa Izvještajem Ustavnopravne komisije Doma naroda o obustavljanju postupka za autentično tumačenje člana 7. stav (2) Zakona o slobodnim zonama u BiH („Službeni glasnik BiH“, br. 3/02 i 13/03);
 - Upoznavanje sa Izvještajem Ustavnopravne komisije Doma naroda o obustavljanju postupka za autentično tumačenje člana 23. Zakona o Javnom radiotelevizijskom sistemu BiH („Službeni glasnik BiH“, br. 78/05);

Predloženi dnevni red usvojen je jednoglasno.

Ad. -1. Usvajanje Zapisnika 27. sjednice Komisije

Zapisnik 27. sjednice Komisije usvojen je jednoglasno.

Ad. -2. Razmatranje Prijedloga zakona o izmjenama i dopunama Zakona o konkurenciji (druga komisijska faza), predlagač: Vijeće ministara BiH

Predsjedavajuća Komisije Alma Čolo podsjetila je prisutne na dosadašnju proceduru ovog prijedloga zakona i u tom smislu istakla je da je Vijeće ministara BiH, kao ovlašteni predlagač, 29.4.2009., Parlamentarnoj skupštini BiH dostavilo Prijedlog zakona o izmjenama i dopunama Zakona o konkurenciji, sa zahtjevom za razmatranje po osnovnom zakonodavnom postupku. Ustavnopravna komisija Doma naroda Parlamentarne skupštine BiH, na 38. sjednici, održanoj 4.6.2009., razmatrala Prijedlog zakona i dostavila mišljenje da postoji valjan ustavnopravni osnov za usvajanje navedenog zakona kao i usaglašenost sa Ustavom BiH i pravnim sistemom BiH.

U nastavku je podsjetila da je Komisija podržala principe Prijedloga zakona na 27. sjednici, održanoj 11.6.2009., a da je Dom naroda usvojio Prijedlog zakona u prvom čitanju na 31. sjednici, održanoj 18.6.2009. Prilikom usvajanja Prijedloga zakona u prvom čitanju Dom naroda donio je i zaključak da se amandmanska faza produžuje do 48 sati prije održavanja sjednice Komisije na kojoj će biti razmatran. Predstavnički dom usvojio je Prijedlog zakona u drugom čitanju na 56. sjednici, održanoj 24.6.2009., sa šest amandmana.

Predsjedavajuća je upoznala prisutne da su u toku amandmanske faze amandmane pravovremeno uložili delegati Zoran Koprivica (tri amandmana) i Ilija Filipović (dva amandmana). Podsjetila je da se nakon rasprave Komisija prvo izjašnjava o predloženim amandmanima u skladu s članom 104. stav 2. Poslovnika, a potom se glasa o Prijedlogu zakona u cjelini, član 104. stav 4. Poslovnika. Predsjedavajuća Komisije pozvala je podnosioc amandmana da daju obrazloženje.

Zoran Koprivica rekao je da je u amandmanskoj fazi uložio tri amandmana, te da je jedan od njih usvojen na sjednici Predstavničkog doma. Radi se o prvom amandmanu te je iskazao spremnost da odustane od preostala dva. Predložio je da Komisija usvoji njegov prvi predloženi amandman. U obrazloženju amandmana rekao je da se radi o jezičkim ispravkama u tekstu Zakona o konkurenciji.

Ilija Filipović dao je obrazloženje za dva predložena amandmana. Naglasio je da su ovi amandmani predloženi s ciljem postizanja operativnijeg rada Konkurencijskog vijeća BiH. U amandmanu I. predložio je da se predsjednik bira svake druge godine. U obrazloženju amandmana istakao je da se dosadašnja praksa da se predsjednik Konkurencijskog vijeća bira svake godine nije pokazala dobrim rješenjem i da je znatno uticala na efikasnost rada. U amandmanu II. predložio je se smanji broj članova Vijeća potrebnih za kvorum, odnosno punovažno odlučivanje na sjednicama Vijeća. Amandmanom je predloženo da Konkurencijsko vijeće može punovažno odlučivati ako sjednici prisustvuju najmanje četiri člana, dok bi način donošenja odluka ostao potpuno isti. Istakao je da se u dosadašnjoj praksi pokazalo da ima dosta problema prilikom osiguravanja kvoruma od najmanje pet prisutnih članova.

Stjepo Pranjić, predsjednik Konkurencijskog vijeća BiH, iznio je stavove Vijeća i resornog ministarstva na predložene amandmane. Istakao je da je Amandman I. Zorana Koprivice prihvatljiv. Za amandmane Ilije Filipovića istakao je da su prihvatljivi i da će uticati na poboljšanje rada Konkurencijskog vijeća.

Predsjedavajuća Komisije osvrnula se na amandmane koje je uložio delegat Ilija Filipović. Podsjetila je da ovi amandmani nisu među onima prihvaćenim u Predstavničkom domu i da se odnose na članove Zakona o konkurenciji koji uopće nisu obuhvaćeni Prijedlogom zakona o izmjenama i dopunama Zakona o konkurenciji. Radi se o čl. 22. i 24. Zakona o konkurenciji. Podsjetila je da je dosadašnja praksa u oba doma PSBiH bila da se ne ulažu amandmani na članove osnovnog teksta zakona koji nisu obuhvaćeni Prijedlogom zakona o izmjenama i dopunama. Obratila se predsjedniku Konkurencijskog vijeća s pitanjem zašto ove izmjene nisu odmah ugrađene u Prijedlog zakona, odnosno prije dostavljanja u parlamentarnu proceduru.

Stjepo Pranjić je, u ime predlagača, istakao da potreba da se i ove izmjene ugrade u Prijedlog zakona nije blagovremeno uočena, te dodao da vjerovatno ima potrebe i za nekim drugim izmjenama koje će naknadno biti uočene. Zbog toga smatra da je dobro da se ove izmjene koje su sada uočene ugrade u Prijedlog zakona i ponovo naglasio da će takve izmjene značajno unaprijediti efikasnost rada Konkurencijskog vijeća, te pozvao članove Komisije da podrže amandmane delegata Ilije Filipovića.

Ilija Filipović također je zatražio riječ da bi dodatno obrazložio svoje amandmane u svjetlu diskusije koju je iznijela predsjedavajuća Komisije. Istakao je da u poslovniku ni jednog od domova Parlamentarne skupštine BiH nema zapreka djelovati na osnovni tekst i dodao da ne vidi zašto se ne bi moglo djelovati na izmjene i drugih članova ako je već predloženo da se neki zakonski akt mijenja. Osim toga, kao drugi važan elemenat za prihvatanje ovih amandmana istakao je to što se radi o funkcionalnim popravkama osnovnog teksta kojim bi se unaprijedila efikasnost rada Konkurencijskog vijeća.

Duška Majkić kao i Slobodan Šaraba su od predlagača Zakona i amandmana zatražili dodatna objašnjenja u smislu donošenja odluka u Konkurencijskom vijeću u slučaju da amandmani budu prihvaćeni. U odgovoru je istaknuto da se u tom dijelu ništa neće mijenjati, odnosno da je u Zakonu o konkurenciji predviđeno da se odluke Konkurencijskog vijeća donose većinom glasova prisutnih članova, s tim da za svaku odluku mora glasati najmanje po jedan član iz konstitutivnih naroda.

Adem Ibrahimpašić istakao je da će podržati sve predložene amandmane a time i amandmane Ilije Filipovića za koje vjeruje da će povećati efikasnost rada Konkurencijskog vijeća, jer prevelik broj članova svakog tijela otežava njegov rad.

Prije nego što se pristupilo izjašnjavanju o predloženima amandmanima, predsjedavajuća Komisije predložila je da je neophodno da se izvrše određene dopune u predloženim amandmanima u skladu s Jedinstvenim pravilima za izradu pravnih propisa, što je predlagač prihvatio. Posebno je istakla da je potrebno u amandmanima Ilije Filipovića navesti gdje će se novi članovi koji se predlažu amandmanima naći u Prijedlogu zakona, te navesti da se ostali članovi nakon novih članova pomjeraju, odnosno dobivaju novi redni broj.

Nakon rasprave, Komisija je jednoglasno prihvatila sljedeće amandmane:

Amandman I.

U članu 7. Prijedloga zakona vrše se sljedeće dopune:

- u članu 11. Zakona o konkurenciji u stavu (3), koji ovim izmjenama postaje stav (2), iza riječi: „smatra se da“ dodaje se riječ „se“;
- u članu 11. Zakona o konkurenciji u stavu (4), koji ovim izmjenama postaje stav (3), iza riječi: „ne zloupotrebljava“ riječ „se“ briše se.

Amandman II.

Iza člana 13. Prijedloga zakona dodaje se novi član 14., koji glasi:

U članu 22. Zakona o konkurenciji stav (4) mijenja se i glasi:

„Vijeće ministara BiH, na prijedlog Ministarstva vanjske trgovine i ekonomskih odnosa BiH i/ili na svoj prijedlog, imenuje predsjednika Konkurencijskog vijeća, između članova iz svih konstitutivnih naroda, na mandat od dvije godine, bez prava na ponovni izbor tokom mandata člana Konkurencijskog vijeća.“

Amandman III.

Iza novog člana 14. Prijedloga zakona dodaje se novi član 15., koji glasi:

U članu 24. Zakona o konkurenciji stav (1) riječ „pet“ zamjenjuje se riječju „četiri“.

Čl. od 14. do 24. postaju čl. od 16. do 26.

Nakon provedene rasprave, u skladu s članom 104. Stav (4) Poslovnika Doma naroda, Komisija je jednoglasno prihvatila Prijedlog zakona o izmjenama i dopunama Zakona o konkurenciji sa usvojenim amandmanima, te predložila Domu naroda Parlamentarne skupštine BiH njegovo usvajanje.

U skladu s odredbama člana 107. Poslovnika Doma naroda Parlamentarne skupštine BiH, za izvjestioca na sjednici Doma Komisija je odredila Almu Čolo, predsjedavajuću Komisije.

Ad. - 3. Razmatranje Prijedloga zakona o izmjenama i dopunama Zakona o osnovama sigurnosti saobraćaja na putevima u BiH (prva komisijska faza), predlažać: Zajednička komisija za ljudska prava, prava djeteta, mlade, imigracije, izbjeglice, azil i etiku Parlamentarne skupštine BiH

Predsjedavajuća Komisije podsjetila je da se Prijedlog zakona razmatra u skladu s članom 98. Poslovnika, tj. radi dostavljanja Domu naroda mišljenja o principima predloženog zakona. Dalje je istakla da je Prijedlog zakona o izmjenama i dopunama Zakona o osnovama sigurnosti saobraćaja na putevima u BiH, 18.5.2009., u parlamentarnu proceduru uputila Zajednička komisija za ljudska prava, prava djeteta, mlade, imigracije, izbjeglice, azil i etiku Parlamentarne skupštine BiH, kao ovlašteni predlažać, radi razmatranja po osnovnom zakonodavnom postupku. Dodala je da je Ustavnopravna komisija Doma naroda Parlamentarne skupštine BiH, na 39. sjednici, održanoj 19.6.2009., razmatrala Prijedlog zakona i dostavila mišljenje da postoji valjan ustavnopravni osnov za usvajanje navedenog zakona kao i usaglašenost sa Ustavom i pravnim sistemom BiH.

Rudo Vidović, ministar komunikacija i prometa BiH, iznio je mišljenje nadležnog ministarstva. Naglasio je da je Ministarstvo studiozno razmotrilo prijedlog Zajedničke komisija za ljudska prava, prava djeteta, mlade, imigracije, izbjeglice, azil i etiku Parlamentarne skupštine BiH. Istakao je da je stav Ministarstva o Prijedlogu zakona o izmjenama i dopunama Zakona o osnovama sigurnosti saobraćaja na putevima u BiH pozitivan i da je kao takav i jednoglasno prihvaćen u Vijeću ministara BiH, uz dvije izmjene koje su u Predstavničkom domu u drugoj komisijskoj fazi prošle kao amandmani. Rekao je da će učestvovati u radu Komisije i u drugoj komisijskoj fazi ovog zakona, kada će se detaljnije govoriti o sadržaju Prijedloga zakona. Predložio je članovima Komisije da prihvate ovaj prijedlog i podrže principe ovog zakona.

Duška Majkić rekla je da je ovaj prijedlog samo jedan od elemenata i načina da se zaštite djeca u saobraćaju, ali da svakako nije jedini. Naglasila je da je bilo još prijedloga da se sigurnost djece dovede na veći nivo. Navela je činjenicu da je davno formirana radna grupa koja je trebalo da radi na doradi i sređivanju ovog zakona. Istakla je da još nismo dobili nijedan dokument koji je plod rada ove radne grupe. Rekla je da je Bosna i Hercegovina kroz ovaj zakon trebalo da usvoji oko 25 podzakonskih akata zbog čijeg nedonošenja na nivou BiH postoje ozbiljni problemi u ovoj oblasti. Kao primjer navela je nepostojanje testova za polaganje vozačkog ispita, što čini jako lošom samu proceduru polaganja vozačkog ispita i

stvara prostor za malverzacije. Istakla je da je reguliranje i ovog pitanja jedan od načina da se zaštite djeca u saobraćaju. Naglasila je da ovaj zakon zahtijeva punu pažnju Ministarstva i istakla potrebu što hitnijeg donošenja izmjena i dopuna kojim će se učiniti primjerenijim vremenu i potrebama i evropskim direktivama, koje bi trebalo da stoje iza njega.

Zahida Hurtić-Strika, šef Odsjeka za normativnu djelatnost u Ministarstvu komunikacija i prometa BiH, rekla je da je u završnoj fazi izrada Nacrta zakona o izmjenama i dopunama postojećeg Zakona o osnovama sigurnosti saobraćaja na putevima u BiH, o kojem će se raspravljati na sjednici Kolegija Ministarstva i koji će biti dostupan javnosti na njihovoj veb-stranici.

Predsjedavajuća je upoznala prisutne da je, shodno odredbama člana 98. stav (2), zatraženo i dobiveno mišljenje Direkcije za evropske integracije BiH u kojem je, između ostalog, navedeno da je, nakon provedene analize usklađenosti i poređenja Prijedlog zakona s odgovarajućim pravnim izvorima Evropske unije, Direkcija zaključila da je Prijedlog zakona djelimično usklađen s relevantnim izvorima komunitarnog prava. Međutim, u svom mišljenju Direkcija za evropske integracije ukazuje da „radi pravne sigurnosti i zakonitosti pravnih akata pozivanje na pravne propise Evropske unije u Prijedlogu zakona nije dopušteno“. Naime, članom 2. stav (4) Prijedloga zakona predviđeno je da: „Sigurnosna sjedalica mora imati oznaku u skladu s važećim standardima Regulacije 44 Ekonomske komisije UN-a za Evropu ili Direktive 75/541/EC“. S tim u vezi Direkcija za evropske integracije u svom mišljenju sugerira „da se transpozicija izvrši na odgovarajući način tako da cilj odredbe iz Direktive bude postignut“.

Svi članovi Komisije saglasili su se da je potrebno da se stav Direkcije za evropske integracije BiH uvaži i prilikom razmatranja Prijedloga zakona u drugoj komisijskoj fazi.

Nakon rasprave, Komisija je jednoglasno podržala principe Zakona o osnovama sigurnosti saobraćaja na putevima u BiH.

Komisija je, također jednoglasno, odlučila predložiti Domu naroda da, prilikom usvajanja Prijedloga zakona u prvom čitanju, donese i sljedeći zaključak: “S obzirom da Predstavnički dom Parlamentarne skupštine BiH još nije završio proceduru usvajanja Prijedloga zakona o izmjenama i dopunama Zakona o osnovama sigurnosti saobraćaja na putevima u BiH, produžava se amandmanska faza za ovaj prijedlog zakona do 48 sati prije održavanja sjednice Komisije za vanjsku i trgovinsku politiku, carine, saobraćaj i komunikacije Doma naroda na kojoj će biti razmatran u drugoj komisijskoj fazi”.

Ad. - 4. Davanje saglasnosti za ratifikaciju Sporazuma između Vijeća ministara BiH i Vlade Države Izrael o ukidanju viza za nosioce diplomatskih i službenih pasoša

Ad. - 5. Davanje saglasnosti za ratifikaciju Sporazuma između Vijeća ministara BiH i Vijeća ministara Republike Albanije o uzajamnim putovanjima državljana

Predsjedavajuća Komisije predložila je da se oba međunarodna sporazuma razmatraju zajedno s obzirom da su oba u nadležnosti Ministarstva vanjskih poslova BiH i da se odnose na istu problematiku. Prijedlog je jednoglasno prihvaćen. Predsjedavajuća je konstatovala prisustvo predstavnika Ministarstva vanjskih poslova BiH Seada Avdića, te predložila da se on obrati samo ako neko od članova ima pitanja za njega. Nije bilo dodatnih pitanja a članovi Komisije jednoglasno su odlučili predložiti Domu naroda davanje saglasnosti za ratifikaciju;

- *Sporazuma između Vijeća ministara BiH i Vlade Države Izrael o ukidanju viza za nosioce diplomatskih i službenih pasoša, i*
- *Sporazuma između Vijeća ministara BiH i Vijeća ministara Republike Albanije o uzajamnim putovanjima državljana.*

Ad. - 6. Davanje saglasnosti za ratifikaciju Sporazuma između Vijeća ministara BiH i Vlade Savezne Republike Njemačke o finansijskoj saradnji u 2006. godini

Ad. - 7. Davanje saglasnosti za ratifikaciju Zasebnog aranžmana između Frankfurta na Majni i Bosne i Hercegovine, koju zastupa Ministarstvo finansija i trezora BiH, kao i Federacije Bosne i Hercegovine, koju zastupa Federalno ministarstvo finansija, i Republike Srpske, koju zastupa Ministarstvo finansija za zamjenu duga 2

Predsjedavajuća Komisije predložila je da se i sporazumi pod tač. 6. i 7. dnevnog reda razmatraju zajedno jer su u nadležnosti Ministarstva finansija i trezora BiH i odnose se na istu problematiku, što je jednoglasno i prihvaćeno. Predsjedavajuća je konstatirala da je Miroljub Krunić, pomoćnik ministra finansija i trezora BiH, u ime nadležnog ministarstva, prisutan sjednici.

Kako nije bilo dodatnih pitanja, *članovi Komisije jednoglasno su odlučili predložiti Domu naroda davanje saglasnosti za ratifikaciju:*

- *Sporazuma između Vijeća ministara BiH i Vlade Savezne Republike Njemačke o finansijskoj saradnji u 2006. godini, i*

- *Zasebnog aranžmana između Frankfurta na Majni i Bosne i Hercegovine, koju zastupa Ministarstvo finansija i trezora BiH, kao i Federacije Bosne i Hercegovine, koju zastupa Federalno ministarstvo finansija, i Republike Srpske, koju zastupa Ministarstvo finansija za zamjenu duga 2.*

Ad. -8. Davanje saglasnosti za ratifikaciju Konvencije o zaštiti i korištenju prekograničnog vodotoka i međunarodnih jezera, Helsinki, 17. marta 1992. godine

Za dodatne informacije i obrazloženja za pomenutu konvenciju, u ime nadležnog ministarstva bila je prisutna Brankica Pandurević, šef Odsjeka za vodne resurse i turizam.

Članovi Komisije jednoglasno su odlučili predložiti Domu naroda davanje saglasnosti za ratifikaciju Konvencije o zaštiti i korištenju prekograničnog vodotoka i međunarodnih jezera, Helsinki, 17. marta 1992. godine.

Ad. -9. Davanje saglasnosti za ratifikaciju Dodatka na Memorandum o razumijevanju između Vijeća ministara BiH i Vlade Kraljevine Holandije o Programu za saradnju s tržištima u nastajanju (PSOM)

Predsjedavajuća je konstatirala da sjednici ne prisustvuje predstavnik nadležnog ministarstva, ali je ipak predložila članovima Komisije da predlože Domu naroda davanje saglasnosti.

Članovi Komisije jednoglasno su odlučili predložiti Domu naroda davanje saglasnosti za ratifikaciju Dodatka na Memorandum o razumijevanju između Vijeća ministara BiH i Vlade Kraljevine Holandije o Programu za saradnju s tržištima u nastajanju (PSOM).

- Ad. -10. Davanje saglasnosti za ratifikaciju Konvencije o klauzulama o radu (javni ugovori), broj: 94 iz 1949. godine, i Preporuke o klauzulama o radu (javni ugovori), broj: 84 iz 1949. godine, Međunarodne organizacije rada**
- Ad. -11. Davanje saglasnosti za ratifikaciju Konvencije o radu na nepuno radno vrijeme, broj: 175 iz 1994. godine, i Preporuke o radu na nepuno radno vrijeme, broj: 182 iz 1994. godine, Međunarodne organizacije rada**
- Ad. -12. Davanje saglasnosti za ratifikaciju Konvencije o sigurnosti i zdravlju u rudnicima, broj: 176 iz 1995. godine, i Preporuke o sigurnosti i zdravlju u rudnicima, broj: 183 iz 1995. godine, Međunarodne organizacije rada**
- Ad. -13. Davanje saglasnosti za ratifikaciju Konvencije o radu kod kuće, broj: 177 iz 1996. godine, i Preporuke o radu kod kuće broj: 184 iz 1996. godine, Međunarodne organizacije rada**
- Ad. -14. Davanje saglasnosti za ratifikaciju Konvencije o privatnim agencijama za zapošljavanje, broj: 181 iz 1997. godine, i Preporuke o privatnim agencijama za zapošljavanje, broj: 188 iz 1997. godine, Međunarodne organizacije rada**
- Ad. -15. Davanje saglasnosti za ratifikaciju Konvencije o zaštiti materinstva, broj: 183 iz 2000. godine, i Preporuke o zaštiti materinstva, broj: 191 iz 2000. godine, Međunarodne organizacije rada**
- Ad. -16. Davanje saglasnosti za ratifikaciju Konvencije o sigurnosti i zdravlju u poljoprivredi, broj: 184 iz 2001. godine, i Preporuke o sigurnosti i zdravlju u poljoprivredi, broj: 192 iz 2001. godine, Međunarodne organizacije rada**
- Ad. -17. Davanje saglasnosti za ratifikaciju Konvencije Međunarodne organizacije rada o identifikacionim dokumentima pomoraca (revidirana), broj: 185 iz 2003. godine.**
- Ad. -18. Davanje saglasnosti za ratifikaciju Konvencije o radu u ribolovu, broj: 188 iz 2007. godine, i Preporuke o radu u ribolovu broj: 199 iz 2007. godine**
- Ad. 19. Davanje saglasnosti za ratifikaciju Konvencije Međunarodne organizacije rada o radu na moru (MLC) iz 2006. godine**

S obzirom da su sporazumi pod tač. od 10. do 19. dnevnog reda u nadležnosti Ministarstva civilnih poslova BiH, prihvaćen je prijedlog predsjedavajuće Komisije da se razmatraju zajedno.

Članovi Komisije jednoglasno su odlučili predložiti Domu naroda davanje saglasnosti za ratifikaciju:

- *Konvencije o klauzulama o radu (javni ugovori), broj: 94 iz 1949. godine, i Preporuke o klauzulama o radu (javni ugovori), broj: 84 iz 1949. godine, Međunarodne organizacije rada,*
- *Konvencije o radu na nepuno radno vrijeme, broj: 175 iz 1994. godine, i Preporuke o radu na nepuno radno vrijeme, broj: 182 iz 1994. godine, Međunarodne organizacije rada,*
- *Konvencije o sigurnosti i zdravlju u rudnicima, broj: 176 iz 1995. godine, i Preporuke o sigurnosti i zdravlju u rudnicima, broj: 183 iz 1995. godine, Međunarodne organizacije rada,*
- *Konvencije o radu kod kuće, broj: 177 iz 1996. godine, i Preporuke o radu kod kuće broj: 184 iz 1996. godine, Međunarodne organizacije rada,*
- *Konvencije o privatnim agencijama za zapošljavanje, broj: 181 iz 1997. godine, i Preporuke o privatnim agencijama za zapošljavanje, broj: 188 iz 1997. godine, Međunarodne organizacije rada,*
- *Konvencije o zaštiti materinstva, broj: 183 iz 2000. godine, i Preporuke o zaštiti materinstva, broj: 191 iz 2000. godine, Međunarodne organizacije rada,*

- *Konvencije o sigurnosti i zdravlju u poljoprivredi, broj: 184 iz 2001. godine, i Preporuke o sigurnosti i zdravlju u poljoprivredi, broj: 192 iz 2001. godine, Međunarodne organizacije rada,*
- *Konvencije Međunarodne organizacije rada o identifikacionim dokumentima pomoraca (revidirana), broj: 185 iz 2003. godine,*
- *Konvencije o radu u ribolovu, broj: 188 iz 2007. godine, i Preporuke o radu u ribolovu broj: 199 iz 2007. godine, i*
- *Konvencije Međunarodne organizacije rada o radu na moru (MLC) iz 2006. godine.*

Ad. -20. Razmatranje Izvještaja o radu Upravnog odbora RTVBiH za 2007. i 2008. godinu i Izvještaja o radu RTV BiH za 2008. godinu

Predsjedavajuća je podsjetila da su Izvještaj o radu Upravnog odbora RTVBiH za 2007. i 2008. godinu i Izvještaj o radu RTV BiH za 2008. godinu dostavljeni Parlamentarnoj skupštini BiH 20.5.2009. Uz ove izvještaje dostavljen je i Izvještaj o finansijskom poslovanju BHRT za čije razmatranje je nadležna Komisija za finansije i budžet.

Predsjedavajuća je istakla da su izvještaji dostavljeni u skladu s članom 29. stav (1), tačka k) Zakona o Javnom radio-televizijskom servisu BiH („Službeni glasnik BiH“, br. 32/05), te podsjetila da je Predstavnički dom PSBiH razmatrao i usvojio izvještaje na 55. sjednici, održanoj 10.6.2009.

Dušanka Majkić istakla je da je čudi da se Parlamentarna skupština BiH ponovo bavi izvještajima iz 2007. godine kada je to već jednom razmatrala i odredila se prema tome. Dodala je da smatra da Dom ne treba da se izjašnjava o Izvještaju Upravnog odbora nego da je za Dom važan samo Izvještaj o radu i poslovanju Radio-televizije BiH. Osvrćući se na Izvještaj o radu RTVBiH, istakla je da se ne radi o jednom jedinstvenom dokumentu nego da se radi o prostom zbiru različitih separata, te da nema pogleda s nivoa cijele funkcije. Na kraju je dodala da Komisija treba da primi k znaju izvještaje o radu Upravnog odbora, dok se može izjašnjavati o Izvještaju o radu RTV BiH.

Nikola Deretić osvrnuo se na probleme koje je Upravni odbor ima s prethodnim menadžmentom i koji su uzrokovali i probleme sa Izvještajem o radu RTVBiH za 2007. godinu koji Upravni odbor nije usvojio. Dodao je da je Izvještaj o radu Upravnog odbora za 2007. dostavljen na traženje Predstavničkog doma. Dalje je rekao da je i revizija obavila svoj posao i da je potvrdila ispravnost rada Upravnog odbora. Izrazio je bojazan da tek predstoje veliki problemi u radu RTVBiH. Na kraju je informirao prisutne da je Radio-televizija BiH počela raditi na izboru konsultanskih kuća za sanciju stanja (za konsolidaciju stanja u RTVBiH, za procjenu imovine, izradu računovodstvene politike i za marketing).

Adem Ibrahimpašić istakao je da ni Parlamentarna skupština BiH nije nevina u svemu ovome. Tamo nema pravog domaćina a Parlamentu je data mogućnost da kroz Upravni odbor utiče na poslovanje RTVBiH. Naglasio je da resorno ministarstvo treba više da se bavi stanjem u RTVBiH. Sada kada postoji realna slika stanja na bazi nalaza revizije, treba preduzimati konkretne mjere. Bit će neophodno otpuštanje radnika, jer je očigledno da je tamo skoro polovina radnika višak.

Slobodan Šaraba rekao je da je Parlament stavio tačku na 2007. i da nema potrebe da se Komisija i Dom time više bave. Sada imamo izvještaje za 2008.godinu i oni treba da budu predmet rasprave.

Alma Čolo predložila je da se Izvještaj Upravnog odbora za 2007. i 2008. primi k znanju a da se Izvještaj o radu Radio-televizije BiH za 2008. godinu usvoji i predloži Domu naroda da učini to isto. Osim toga, dodala je da je potrebno da Komisija predloži Domu naroda da donese zaključak i obaveže Upravni odbor RTVBiH da ubrza aktivnosti na provođenju tendera potrebnih za sanaciju stanja u RTVBiH.

Nakon rasprave Komisija je jednoglasno:

- *primila k znanju Izvještaj o radu Upravnog odbora Radiotelevizije BiH za 2007.godinu i 2008.godinu i predložila Domu naroda da učini isto,*
- *prihvatila Izvještaj o radu Radiotelevizije BiH za 2008.godinu i predložila Domu naroda njegovo usvajanje.*

Komisija je jednoglasno usvojila isljedeći zaključak, te predlaže Domu njegovo usvajanje:

„Dom naroda Parlamentarne skupštine BiH zadužuje Upravni odbor Radiotelevizije BiH da ubrzano nastavi realizirati aktivnosti u provođenju tendera za izbor konsultantskih kuća za izradu strategije konsolidacije BHRT-a, procjenu vrijednosti imovine, izradu računovodstvene politike i izradu revizije marketinškog poslovanja Radiotelevizije Bosne i Hercegovine“.

Za izvjestioca na sjednici Doma naroda imenovana je Alma Čolo, predsjedavajuća Komisije.

Ad. -21. Razmatranje Rang-liste kandidata za člana Upravnog odbora Javnog radiotelevizijskog servisa BiH iz srpskog naroda (Dopis Regulatorne agencije za komunikacije BiH, broj: 01-50-1687-1/09, od 15.6.2009.)

Predsjedavajuća je na početku informirala da je Regulatorna agencija za komunikacije BiH, 18.6.2009., dostavila Parlamentarnoj skupštini BiH rang-listu kandidata koji su ušli u uži izbor za člana Upravnog odbora Javnog radiotelevizijskog servisa BiH iz srpskog naroda. Dalje je ukazala na zakonsku proceduru te istakla da je članom 26. stav 1. Zakona o Javnom radiotelevizijskom servisu BiH („Sl. glasnik BiH“, br. 92/05) propisano da Regulatorna agencija za komunikacije BiH počinje postupak za izradu rang-liste kandidata za člana Upravnog odbora Javnog RTV servisa četiri mjeseca prije isteka mandata članovima Upravnog odbora. Regulatorna agencija za komunikacije BiH je, 7.5.2009., raspisala Konkurs za člana Upravnog odbora Javnog RTV servisa BiH iz srpskog naroda i utvrdila rang-listu kandidata koji su ušli u uži izbor. Komisija razmatra dostavljenu rang-listu i, ako je prihvati, upućuje je Domu naroda s prijedlogom da, u skladu s članom 26. stav 1. Zakona o Javnom radiotelevizijskom servisu BiH, imenuje člana Upravnog odbora s rang- liste kandidata koji su ušli u uži izbor.

Emir Povlakić, rukovodilac Sektora Regulatorne agencije za komunikacije BiH, dao je obrazloženje u kojem je rekao da se na konkurs za izbor člana Upravnog odbora JRTV servisa BiH iz srpskog naroda prijavilo ukupno deset kandidata. Od tih kandidata jedan kandidat je odustao, dok je preostalih devet bilo pozvano na intervju. Nakon provedene procedure izbora, Komisija je utvrdila rang-lista od četiri kandidata, koja je dostavljena Parlamentarnoj skupštini BiH kako bi izvršila imenovanje.

Dušanka Majkić je, analizirajući listu kandidata, istakla da nijedan kandidat nema iskustvo u radu s medijima. Naglasila je da je u situaciji u kojoj se nalazi BHRT jako važno da član Upravnog odbora Javnog radiotelevizijskog servisa BiH ima iskustvo u radu s medijima te da može da doprinese sređivanju stanja. Postavlja se pitanje na osnovu čega je Komisija RAK –a napravila rang-listu. Istakla je da delegati iz srpskog naroda neće podržati ovakvu rang-listu.

Slobodan Šaraba složio se s mišljenjem Dušanke Majkić da je neophodno da lice koje dolazi u Upravni odbor mora imati iskustvo u radu s medijima i izrazio svoje žaljenje što odlaze jako kvalitetni kadrovi koji su stekli ovo iskustvo. Rekao je da smatra da nisu ponuđeni najbolji kandidati i zatražio imena i ostalih pet kandidata.

Emir Povlakić naveo je imena i ostalih kandidata koji su konkurirali. To su: Mladen Mirosavljević, Nenad Novaković, Vladimir Marčeta, Duško Pevulja i Mićo Trivić, dok je Biljana Bogdanić odustala.

Adem Ibrahimpašić rekao je da će podržati predloženu rang-listu a sve s ciljem poštovanja institucija i uvažavanja njihovih mišljenja i stavova za posao za koji su zadužene.

Nakon rasprave, s dva glasa „za“ i dva glasa „protiv“, Komisija nije prihvatila Rang-listu kandidata za člana Upravnog odbora Javnog radiotelevizijskog servisa BiH iz srpskog naroda.

Ad. -22.Razmatranje informacije Ministarstva vanjskih poslova BiH o stanju i razvoju DKP mreže Bosne i Hercegovine (Dopis Ministarstva vanjskih poslova BiH, broj: 10/1-1-2-05-5992-3/09, od 11.6.2009.)

Predsjedavajuća Komisije konstatirala da je Informacija dostavljena kao odgovor na zaključak SA 8. zajedničke sjednice oba doma PSBiH, održane 23.4.2008., prilikom rasprave o drugoj tački dnevnog reda: Informacija o stanju u DKP mreži Bosne i Hercegovine. Podsjetila je da je toj sjednici je, između ostalih, prisustvovao ministar vanjskih poslova BiH, ali da sjednici nije prisustvovao niko od članova Predsjedništva BiH. Zbog te činjenice odlučeno je da se ne vodi rasprava o toj tački dnevnog reda. Nakon izjašnjavanja da se ne vodi rasprava, članovi oba doma PSBiH prihvatili su prijedlog poslanika Milorada Živkovića da se usvoje zaključci iz mišljenja Komisije za vanjske poslove Predstavničkog doma i Komisije za vanjsku i trgovinsku politiku, carine, saobraćaj i komunikacije Doma naroda PSBiH u kojem se traži dostavljanje detaljne informacije o stanju u DKP mreži i provođenju vanjske politike. Osim toga, Živković je predložio, što je i prihvaćeno, da se ta informacija dopuni sa sljedećim informacijama: imenima i prezimenima ambasadora – da li su karijerni ili stranački kadar, državljanstvu i stručnoj spremi ambasadora, finansijskim aspektima svake pojedinačne ambasade, strategiji razvoja DKP mreže i četvorogodišnjim planom rada, te mjerama i aktivnostima za realizaciju plana.

Sead Avdić, savjetnik u Kabinetu ministra vanjskih poslova BiH, dao je uvodno obrazloženje za Informaciju o stanju i razvoju DKP mreže BiH. Naglasio je da se sastoji od pet poglavlja i pojasnio šta sadržajno obuhvataju.

Slobodan Šaraba istakao je da je Informacija o stanju i razvoju DKP mreže BiH loša i jako površna. Izrazio je nezadovoljstvo sa strategijom razmještaja diplomatskih predstavništava kao i s kvalitetom ljudi koji nas predstavljaju, navodeći primjer lošeg ambasadora u Kuvajtu. Rekao je da smatra da je svima stalo da Bosnu i Hercegovinu predstavljaju ozbiljni i odgovorni ljudi, karijerne diplomate, ali da u susretu s pojedinim diplomatskim predstavnicima kao i iz Informacije vidimo da to nije tako. Rekao je da je žalosno da nemamo diplomatsko konzularno predstavništvo u Južnoj Americi, Africi kao i to da je zatvoren konzulat u Bonu, prema kojem je bio okrenut veliki broj naših ljudi. Istakao je da je uz ovaj izvještaj trebalo da bude i izvještaj Predsjedništva BiH, tj. dopuna jer je i Predsjedništvo BiH nadležno za vođenje vanjske politike BiH.

Dužanka Majkić naglasila je da bi Parlament mogao da radi i donese konkretne zaključke mora da ima takav materijal koji mu omogućava pregled i uvid u stanje DKP mreže BiH. Izrazila je žaljenje što takav materijal nije dostavljen 2008. godine kao ni sada, 2009. godine. Rekla je da je dostavljena informacija loša i površna te da ne daje mogućnost uvida u rad i finansijsko stanje svake ambasade posebno. Naglasila je da poslanici ne mogu voditi raspravu o činjenicama koje im svima nisu poznate. Kao primjer navela je abasadu u Velikoj Britaniji, koju je BiH dobila u sukcesiji iz bivše Jugoslavije i koja ima 4-5 spratova. Zgrada se nalazi u centru Londona. Osoblje Ambasade smješteno je na jednom spratu dok je ostali dio zgrade prazan. Istakla je da bi prodaja te zgrade mogla riješiti pitanje ambasade u nekoliko zemalja. Loša informacija vodi ka tome da stanje u DKP mreži BiH i dalje bude loše. Predložila je da se ovaj materijal dostavi Predsjedništvu BiH koje, zajedno s Ministarstvom vanjskih poslova BiH, treba Parlamentarnoj skupštini BiH dostaviti kvalitetnu i sveobuhvatnu informaciju i strategiju razvoja DKP mreže.

Sead Avdić rekao je da se slaže s dijelom prethodnih diskusija. Međutim, istakao je da je Ministarstvo ipak uradilo veliki dio poslova iz svoje nadležnosti. Naglasio je da je Ministarstvo vanjskih poslova uradilo i usaglasilo dokument koji sadrži pravce i prioritete vođenja vanjske politike BiH, i da je taj dokument decembru 2008. godine upućen Predsjedništvu BiH na razmatranje i usvajanje. Međutim, Predsjedništvo BiH se još uvijek nije oglasilo o ovom dokumentu.

Dalje je dodao da Ministarstvo vanjskih poslova BiH ima detaljne analize o poslovanju svake ambasade posebno, te da nisu dostavljene Parlamentarnoj skupštini BiH zbog obimnosti materijala, ali da se to može svakako učiniti vrlo brzo. Za razvoj DKP mreže postoji projekcija koju nije moguće realizirati s finansijskog aspekta. Također je rekao da se u Ministarstvu vanjskih poslova BiH svaka primjedba poslanika i delegata Parlamentarne skupštine BiH prihvata i da se preduzimaju mjere za njihovo otklanjanje. Naglasio je da je Ministarstvo ispunilo svoje strateške zadatke, napravljen je Prijedlog zakon o vanjskoj politici koji je dostavljen Predsjedništvu BiH, kao i Prijedlog zakona o načinu zaključivanja međunarodnih sporazuma, te Strategiju ekonomskog razvoja diplomatije što predstavlja okvir djelovanja Ministarstva vanjskih poslova BiH.

Komisija je konstatala da u Informaciji nije odgovoreno na sve zahtjeve iz zaključaka usvojenih na 8. zajedničkoj sjednici oba doma PSBiH, te jednoglasno usvojila sljedeći zaključak i predložila Domu naroda PSBiH njegovo donošenje:

Dom naroda Parlamentarne skupštine BiH traži od Ministarstva vanjskih poslova BiH da, u koordinaciji s Predsjedništvom BiH, dopuni Informaciju o stanju i razvoju diplomatsko-konzularne mreže Bosne i Hercegovine u dijelu u kojem nije odgovoreno na zahtjeve iz zaključaka sa 8. zajedničke sjednice oba doma Parlamentarne skupštine BiH, održane 23.4.2008. (finansijski aspekti svake ambasade posebno, racionalizacija DKP mreže, četvorogodišnji plan rada i mjere i aktivnosti za realizaciju), kao i da se u Informaciju uvrsti i stav Predsjedništva BiH o svim pitanjima.

Za izvjestioca na sjednici Doma naroda imenovana je Alma Čolo, predsjedavajuća Komisije.

Ad. -23. Razmatranje izvještaja i informacija Ministarstva vanjskih poslova BiH:

- Nacrt 15. monitoring izvještaja Vijeća Evrope;
- Sastanak Vijeća EU za opće poslove i vanjske odnose, 18. i 19.5.2009., u Briselu;
- Protestna nota Republike Hrvatske;

- Parlamentarna saradnja BiH i Maroka;
- Sastanak Vijeća EU, 15. juni 2009., Brisel;
- Preliminarna analiza izbora za Evropski parlament;
- Informacija Misije BiH pri EU u Briselu o odnosima između BiH i EU.

Članovi Komisije primili su k znanju navedene informacije i izvještaje Ministarstva vanjskih poslova BiH.

Ad. - 24. Razmatranje izvještaja o međunarodnim aktivnostima komisija i parlamentarnih delegacija PSBiH:

- Izvještaj s godišnje ekonomske konferencije Parlamentarne skupštine OSCE-a „Svjetska finansijska kriza“, Dublin, 27. i 28. maj 2009.;
- Izvještaj o posjeti Komisije za vanjske poslove Predstavničkog doma Parlamentarne skupštine BiH Republici Estoniji, 18. i 19. maj 2009.;
- Izvještaj o posjeti Odbora za izbor, imenovanja i upravne poslove Hrvatskog sabora, obavljenog 16.3.2009.

Članovi Komisije primili su k znanju navedene izvještaje o međunarodnim aktivnostima parlamentarnih komisija i delegacija.

Ad. -25. Tekuća pitanja

- Upoznavanje sa Izvještajem Ustavnopravne komisije Doma naroda o obustavljanju postupka za autentično tumačenje člana 7. stav (2) Zakona o slobodnim zonama u BiH („Službeni glasnik BiH“, br. 3/02 i 13/03);
- Upoznavanje sa Izvještajem Ustavnopravne komisije Doma naroda o obustavljanju postupka za autentično tumačenje člana 23. Zakona o Javnom radiotelevizijskom sistemu BiH („Službeni glasnik BiH“, br. 78/05);

Nije bilo rasprave a članovi Komisije jednoglasno su primili k znanju izvještaje Ustavnopravne komisije Doma naroda.

Sjednica Komisije završena je u 14 sati.

Sekretar Komisije
za vanjsku i trgovinsku politiku,
carine, saobraćaj i komunikacije
Nenad Pandurević

Predsjedavajuća Komisije
za vanjsku i trgovinsku politiku,
carine, saobraćaj i komunikacije
Alma Čolo